



Terenga 3: Hōtaka 21 – Whakataurite 1

He Mihi

Kei aku kōpara e kōkī ai i te ata, tiu mai ki tēnei māra a Tāne e rere ngātahi ai ngā reo ki runga ki ngā hau o te wā.

Hei Mahi Whakarongo

Kia whakarongo tātou ināianei ki ngā kōrero a Te Arahi Maipi i muri mai i tana haerenga ki Ahitereiria ki te tiroiro i ngā mahi pāpāho o reira. Anei ngā pātai hei whakautu mā koutou:

- 1) He aha te take i haere ai ia ki reira?
- 2) He aha ngā āhuatanga ōrite o Whakaata Māori me NITV?
- 3) He aha te pūtake o ngā hōngere a Whakaata Māori?

He Whakamārama

He kiwaha te aronga o tēnei wāhanga.

Me kore ake...

He kiwaha tēnei hei tohu i te ōrite o te āhua o tētehi tangata ki tō tētehi atu.

Tirohia ēnei taurira:

- i. Mere: Aii! He taringa kōhatu ō te tamaiti rā.
Rino: Me pēhea e kore ai? Me kore ake te pāpā.
- ii. Rore: Me kore ake te māmā i te tamāhine.
Hatu: Āna, e tā! E rua, e rua, he taiea.

Nō reira...

- he kiwaha whakataurite tēnei.
- kāore he 'ki' i waenga i ngā mea e rua e whakatauritehia ana
- ki te whakatauritehia ngā tāngata e rua, hei reira whakaurua ai te 'i'

Anei tētehi rerenga ōrite te tikanga ki te taurira tuarua o runga ake nei:

- Me kore ake **te māmā i te tamāhine.**
- He rite **te tamāhine ki te māmā.**

Hei Mahi

Panonihiā ngā rerenga kia tīmata kē ai ki te kiwaha: 'Me kore ake'.

1. He rite au ki aku tuākana.
2. He rite ia ki ō māua mātua.
3. He rite taku mokopuna ki tana pāpā.
4. He rite ki te kaiwaiata opera.

Whakautu:

1. Me kore ake aku tuākana i a au.
2. Me kore ake ō māua mātua i a ia.
3. Me kore ake tana pāpā i taku mokopuna.
4. Me kore ake te kaiwaiata opera.